

東
華
續
錄

東華續錄

同治四十九

臣王先謙敬編

臣張式恭恭校

秋七月癸亥朔諭軍機大臣等劉蓉奏定邊防軍疊勝遵旨添兵防守要隘回酋赫明堂心懷叵測派兵分防邠隴等處並遵派勁兵前赴潼關防堵各摺片計省回匪盤踞靈州大水阮等處時赴定邊交界之區肆行擄掠經該處防兵截擊殄斃多名而定靖一帶毗連甘境路徑分歧必應添兵防守劉蓉見飭同知郭太愚督帶四營會合段登雲等扼要堵禦卽著飭令該員弁等加意嚴防遇賊卽擊其郿延一帶要隘並著督飭總兵楊得勝等認真扼剿毋稍疏虞楊能格仍遵前旨嚴飭魏添應等相機截剿毋爲該逆所乘回酋赫明堂招集回眾已至八九千人之多萬一口乏食

必將肆行搶劫故態復萌楊岳斌既慮其終爲邊患自當籌防
範隨時咨商雷正綰設法鈐制相機解散以期消患未形其分隴
鳳略一帶卽著劉蓉檄令總兵劉玉興等軍迅速赴防扼要駐紮
並令蕭慶高分兵嚴防藉資策應捻匪竄至許州徑趨襄郟距陝
漸近劉蓉見派劉厚基統帶五營前赴金斗關駐紮相機截剿著
督率劉厚基實力扼防毋稍懈弛惟兵力尙嫌未厚劉蓉能否酌
量添撥協守以壯聲威之處著迅速籌辦劉蓉另摺奏遵籌雷正
綰軍食已飭甘泉等縣湊撥倉糧二萬石並飭北山附近州縣勸
捐米糧惟運費無款可籌請飭慶陽糧臺自行籌辦等語卽著楊
能格籌備運腳自行轉解以裕軍糧將此由六百里諭知楊岳斌
劉蓉並傳諭楊能格知之○甲子諭軍機大臣等都興阿等奏分
營圍剿甯郡並雷正綰軍進剿失利一摺雷正綰自進剿靈州後

久未見其奏報茲覽都興阿等所奏該軍於初七日攻打金積堡失利由惠安堡退至韋州所部零落不成隊伍曹克忠不知退在何處魏添應一軍亦退至姬家園地方是該軍此次挫敗情形甚重賊勢益肆鴟張甯靈回匪皆將狡焉思逞而都興阿等後路花定一帶尤爲可慮都興阿見派都司李大楷前赴韋州查探雷正綰等情著卽將甯郡前敵各營一面布置穩慎一面迅速抽撥重兵回援後路與雷正綰等軍相機援剿毋稍遲誤雷正綰趕將所部潰勇設法招集力圖整頓剋期再舉該署提督素稱善戰軍律尙嚴何以敗衄至此難保非爲該回求撫所誤此後當妥爲防範萬不可輕爲議撫致墮狡謀甘肅軍情日緊楊岳斌何以仍無抵省信息實屬延緩著趕緊馳赴省城與都興阿雷正綰等咨商調度迅籌策應其金積堡失利情形及曹克忠見在何處並著雷正

綰迅卽馳奏橫城花馬池定邊一帶人心惶惶該處兵力本不甚厚此時賊勢更熾若再乘說東竄勢必掣動全局著都興阿嚴飭翁同書督率各軍加意嚴防遇賊卽擊劉蓉仍飭駐防定靖一帶之同知鄔太愚等軍會同甘省防軍扼要堵剿毋稍疏虞山西邊外防務亦關緊要德勒克多爾濟王榕吉務當會商妥籌將綏遠城等處之防嚴密布置毋得臨渴掘井致滋蔓延將此由六百里諭知都興阿穆圖善雷正綰楊岳斌德勒克多爾濟劉蓉並傳諭王榕吉知之○乙丑諭內閣李鴻章奏請將已革道員家產發還等語已革署浙江甯紹台道張景渠前在關道任內動用浙海關第四五結二成扣款當經降旨將該員家產查鈔備抵茲據奏稱該員前在甯波道任內尙得民心且聯絡弁兵乘間克復鎮海並克甯波紹興各府城著有勞績前欠銀兩見已分結交清所有張

景渠查鈔家產著准予發還收領○諭軍機大臣等李鴻章奏援
閩蘇軍航海回滬見令暫紮鎮江再商調遣一摺郭松林楊鼎勳
等援閩之十六營崎嶇轉戰疲憊異常業經凱撤回蘇自應暫行
休養郭松林受恩深重必以國事爲急見已降旨賞假四箇月回
籍料理葬事屆期卽著銷假以副委任所有松字營兵勇著暫交
楊鼎勳兼統前赴鎮江駐紮聽候曾國藩會商李鴻章相機調遣
髮捻馬隊頗多行蹤飄忽曾國藩前奏扼要設防分道兜剿務使
該匪東出西沒皆不能出吾網羅之外深得致人而不致於人之
法見在該匪分竄豫境南股已抵淮甯西股徑趨襄郟雖經吳昌
壽飭令陳國瑞張曜等督勇追剿恐難遏截兇鋒晉省完善之區
並無得力勁旅設被竄擾關係非輕著曾國藩速派劉銘傳等軍
循河西上酌量水陸兩路孰爲便捷馳赴洛陽以西一帶扼要駐

紫與秦晉防兵聯絡聲勢相機防剿俾賊不得分竄擾及完善劉
蓉王榕吉各宜懍遵疊次諭旨督飭將弁嚴密防剿毋得稍有疏
虞自取罪戾曾國藩是否已回駐徐郡皖豫各軍若何布置所調
馬步各隊曾否齊赴豫境追躡賊蹤該大臣務當隨時馳奏以慰
廑念在籍中允馮桂芬才識若何品行有無可取李鴻章自必知
之甚悉著卽據實奏聞前任御史薛鳴皋是否尙在山西並著王
榕吉查明具奏將此由六百里諭知曾國藩李鴻章吳昌壽劉蓉
並傳諭王榕吉知之○諭前因勞崇光張亮基奏報擒獲逆首包
茅仙正身摺內稱據獲賊供稱銅仁團首李丕基雷洲有與包逆
暗通往來等情當降旨交張亮基研訊茲據都察院奏該團首李
丕基等遣抱以挾恨唆誣等詞來京呈訴據稱係甘佃目團首李
國土挾伊勸捐之嫌買唆逆黨包林林誣扳湖南周鎮輕聽賊供

勢將用剿等語此案李丕基等是否通賊抑係被誣仍著張亮基親提人證秉公確查究辦未可遽信一面之詞與師動剿致滋他變並行知李鴻章飭令周洪印遵照辦理可也原呈稟二件均著鈔給閱看將此諭令知之○停扎什倫布扎薩克喇嘛本年年班貢物○恩合奏奉天新墾牧廠地畝章程設營汛於盤蛇驛揀派佐領一員驍騎校二員帶兵二百名駐守○予江蘇殉難知縣石峻祭葬世職建祠○丙寅諭軍機大臣等玉明等奏擬添官兵剿賊見辦情形一摺據稱奉省東路托火洛等處賊匪竄至大輞子溝八家子一帶滋擾經協領恩科帶兵追剿僅斃賊數名旋爲另股賊匪衝突失利軍械失落所獲礮車復被賊匪奪回見經添兵前往助剿等語此股賊匪聚集至數百人之多竟至擾及興京附近一帶實屬形同叛逆若不及早蕩除爲患何可勝言自應廣籌

經費添派重兵將該匪剿除淨盡以期永絕後患王明等於恩科所帶馬隊三百餘名復添派協領古尼音布德印帶馬步兵一千名馳往剿洗是兵力較前已厚惟器械必須精利打仗必須分作正兵奇兵使前後左右均有接應隊伍紀律均須約束嚴明切不可貪賊所遺財物致爲所乘恩科之由勝而敗王明等當引爲前车之鑒庶免再蹈覆轍駐省之備派官兵千名固須逐日認真操演而城內人煙稠密奸宄潛伏尤宜設法稽查免致省城虛實爲賊所悉至派往之恩科等所統之兵總宜嚴飭盡殲賊匪爲度不准以山深林密駐守邊界豫爲託詞諉卸地步懷之將此各諭令知之○諭明緒奏巴燕岱古城失守塔城危困伊犁孤危並已革伯克通賊大股賊匪攻城督兵解圍情形各摺片巴城失陷穆克登額全家殉難亦經降旨優卹建祠所有隨同殉節之文武員弁

著明緒卽行查明奏請賜卹古城失守後道路梗阻聲息難通疊經嚴催成祿鶴齡等出關援剿文麟於奇台哈密失守後有先剿哈密之議已諭令訥爾濟文麟竭力妥辦明緒務須設法偵探以期消息相通明緒以塔城緊要派布爾和德調兵援救甚屬急公著卽飭令會同武隆額等合力剿辦迅解城圍布爾和德卽准其署理庫爾喀拉烏蘇領隊大臣以專責成東路既經屢次獲勝賊眾敗遁明緒務當督飭在事各員弁統帶得勝兵勇進規綏來縣城爲得步進步之計但須穩慎圖功未可恃勇輕進回眾數萬攻撲伊犁並有哈薩克助逆明緒派額騰額等分隊堵禦數月之中屢次獲捷該回復撲綏定馬兵博清額臨陣退縮明緒立斬以徇官兵爭先效命殺賊並將紅衣賊首殲斃城圍立解逆匪旋又撲城亦經調到官兵奮力剿洗明緒調度得宜深堪嘉尙仍著隨時

訓練認真防範毋稍大意哈薩克助逆必須重加懲創察哈爾官兵徵調不至且與回匪有暗中勾串情事著將該總管等指明嚴參以杜取巧所需餉項已諭令廣鳳等速解並諭知戶部寬爲籌備矣另片奏俄兵相助一節都中辦理殊無把握明緒辦事尙能實心如能就近與西悉畢爾衙門相商通融辦理朝廷亦不爲遙制該使函內既有購買槍礮等情及中國所欲苟爲該國所能宜無不允等語明緒惟當斟酌情形相機商辦諸凡能稍資其力均可爲目前戰守之助其哈薩克助逆爲患俄國已將其帶兵頭人拏去正可因勢利導俾其力除此股匪徒與伊犁亦不無裨益著明緒妥爲籌辦至所稱拏去之哈薩克頭人是否卽係綽坦著明緒設法查明具奏將此由六百里諭令知之○護陝甘總督恩麟奏哈密賊勢猖獗辦事大臣扎克當阿陣亡安西震動得旨扎克

當阿之子著恩麟飭屬妥爲護送入關西安一帶防守事宜著督飭王斌等妥籌辦理毋稍疏虞又奏曹克忠進剿金積堡獲勝批昨據都興阿等奏雷正綰一軍進攻金積堡失利已諭令該提督招集陝勇力圖整頓恩麟務當速籌糧運源源接濟毋得顛預誤事○以遺愛在民追予甘肅秦州陣亡知州托克清阿諡剛烈並入國史循吏傳○予巴燕岱殉難領隊大臣穆克登額祭葬世職建祠○丁卯諭軍機大臣等有入奏髮捻各匪竄入東境巡撫毫無布置藩司縱勇殃民恐誤大局一摺據稱張總愚等股由河南竄入東境旋擾江西贛榆復回竄山東郟城等境僧格林沁盡力追剿聞敬銘安坐省城並不發兵守隘任賊奔突致該大臣遇伏陣亡藩司丁寶楨帶勇出省行至蘭山縣聞賊竄江南並不擇要駐紮遇賊歸路輒卽折回嗣後出省防堵離賊甚遠始終未與賊

遇並縱令兵勇淫掠焚擄閭敬銘置之不問各等語以上所奏該撫等措置失宜各情如果屬實殊負委任卽著曾國藩按照所參各節確切查明據實具奏毋稍徇隱另片奏山東鄒城縣知縣周士溥於賊匪攻撲楊家圩之時並不督率兵勇力爲援救以致被匪攻陷肆行殺戮情殊可恨著該督一併查明參辦原摺片均著鈔給閱看髮捻各股賊匪由皖北竄擾豫境以後近日賊匪情形並勦辦機宜久未據該大臣奏報並著迅速馳奏以慰廛繫前有旨將陳湜調補山西按察使令其辦理防務本日據王榕吉奏到籌防情形復諭令吳昌壽派兵會同山西防兵聯絡堵剿以壯聲勢惟山西兵力究恐單弱仍著曾國藩飭令劉銘傳等軍馳赴豫省西北一帶繞出賊前擇要堵禦以固秦晉之防將此由五百里諭令知之○諭王榕吉奏派兵籌防並添撥礮位扼守沿河要隘

一摺山西潞澤一帶自風門口東灘渡以及平陸縣之茅津渡永濟縣之風陵渡中間大小數十口綿亘六百餘里與陝西之潼關河南之靈閼陝州均止一河之隔王榕吉因處處設兵無此兵力見撥銅鐵礮位二百尊挑選礮兵六百名派參將恩瑞押運河干分段安設並於安礮處所堅築土壘俾兵勇得以護身所籌尙合機宜卽著督飭鄧裕生及恩瑞等妥籌布置不得有名無實徒託空言並著王榕吉檄飭楊寶臣馳往垣曲等處會同和昌激勵兵團認真防守風陵渡爲西南入晉門戶並著責成李慶翱王巨孝等協力嚴防不得稍有疏失至濟源縣之風門口地居要害王榕吉已撥遼州防兵五百名前往駐守吳昌壽亦當酌派勁兵協同守禦毋令客兵孤懸新調山西按察使陳湜前有旨令其接辦防堵事宜該臬司不日卽可到晉所有晉省防務王榕吉務當與之

熟籌妥辦俾免疏虞本日據武隆額奏塔爾巴哈台回匪變亂勦辦喫緊惟經費支絀飢軍潰散堪虞請飭山西巡撫於部撥新疆銀四十萬兩先行籌撥銀三萬兩內扣銀一萬兩卽由山西採買茶布由烏里雅蘇台科布多草地一併轉解來塔以便搭放兵餉等語著王榕吉按照武隆額所請迅速動款採買派員解赴塔城毋許遲誤干咎將此由六百里諭知吳昌壽並傳諭王榕吉知之○諭武隆額奏圍攻禮拜寺逆回情形一摺塔城回匪變亂經武隆額督兵固守城池轉世喇嘛帶領馬隊奮勇攻勦均堪嘉尙該逆盤踞禮拜寺堅守不出其勢自己窮蹙且寺內匪眾僅有三百餘人無難併力圍攻悉殲醜類著武隆額督飭官軍奮勇進勦務將該寺逆回悉數殄除斷不可任其乘間他竄復形滋蔓哈薩克爲回匪勾結屢次擁眾內擾亦經轉世喇嘛帶兵擊散難保不去

而復來仍著武隆額加意嚴防督飭官軍扼紮要隘遇賊卽擊毋
令匪蹤深入轉世喇嘛棍噶扎勒參打仗勇往應如何優獎之處
著武隆額仍遵前旨迅速查明具奏土爾扈特蒙古官兵武隆額
於調到後務須申明紀律加之訓練以期得力伊犁佐領巴霞先
經明緒派令統帶土爾扈特兵剿賊全行潰散嗣經武隆額疊次
嚴催帶兵赴援置若罔聞駝馬處章京主事職銜巴彥圖於回匪
變亂之時私自出城逃走並將關防遺失且揚言塔城已失惑亂
眾心情殊可惡巴霞巴彥圖均著卽行革職該二員見由土爾扈
特游牧潛赴科布多烏里雅蘇台一帶隱藏著明誼麟興車林敦
多布廣鳳奎昌一體嚴密訪查於拏獲訊明後卽行就地正法以
昭炯戒革員陳孚恩見在明緒處隨同辦事崇熙已簡放伊犁領
隊大臣武隆額請調該二員辦理文案之處均毋庸議署領隊郭

羅那督兵擊賊以致遺失關防情尙可原著免其議處將此由六百里各諭令知之○己巳諭軍機大臣等前據崇實駱秉章疊奏藏兵搶掠騷擾圍攻土司住寨等情先後諭令景紋將此項土兵壓令折回茲據景紋奏瞻酋侵占各土司邊界擾塞川藏大道久爲邊患今經被害難夷約會藏兵收復土司各地圍攻瞻酋老巢剿辦正在得手礙難遽行撤回見派員彈壓等語駱秉章前奏瞻對已與明正土司具結息爭景紋又稱藏兵攻打瞻匪正在得手不日可以剿滅所奏情形互異見在瞻對究竟是否尙在構兵史致康係熟悉情形之員其所稟見在情形與景紋有無異詞著崇實駱秉章查探確情據實具奏此項藏兵旣據景紋奏稱暫難撤回卽著該大臣飭令派出各員前往彈壓妥爲開導務令該兵各安本分恪遵約束毋令滋生事端擾害地方該兵人數眾多若駕

馭失宜恐滋尾大不掉之虞景紋惟當督飭委員設法防維不可
稍涉大意該大臣見由裏塘前進卽著星速遄行趨程赴藏毋稍
逗留以副委任將此由五百里各諭令知之○予甘肅殉難道員
萬金鏞被戕知州劉湛暨陣亡道員恆齡參將萬年新等祭葬世
職○黔匪陷石阡府城官軍旋復之予陣亡署知府嚴謹從九品
嚴誠祭葬世職建祠○庚午諭軍機大臣等鮑超奏力疾起程日
期一摺霆營叛勇見與花旗股匪合併竄繞興甯一帶大爲江粵
邊境之患鮑超擬於六月二十八日力疾起程赴鄂募勇往剿具
見以國事爲重惟兵在精不在多鮑超此次召募新勇尤當慎重
簡選嚴明約束務使增一勇得一勇之益總以三四營爲率不准
再多尤不准再以無賴之人雜廁其間致貽後患宋國永覆轍具
在該提督當時時引以爲鑒不可稍涉大意所有該營一切應用

餉項卽著官文鄭敦謹李瀚章孫長紱妥爲籌畫設法協濟俾利
通行漻逆大股尙踞鎮平叛勇又於江粵交界出沒無常鮑超一
軍應由何處先行進兵並著與左宗棠等妥商辦理鮑超到江西
後一切進止機宜卽著歸左宗棠節制以一事權婁雲慶所帶各
營本係鮑超舊部將來卽可仍由該提督調度庶呼應靈通剿賊
必更得力將此由五百里諭知官文左宗棠鄭敦謹李瀚章並傳
諭鮑超孫長紱知之○諭雷正綰奏兵精缺乏疲餒致挫自請嚴
議一摺雷正綰與曹克忠兩軍進攻金積堡回巢因糧運不繼兵
眾飢疲翼力破逆巢因糧於賊爲堡外伏賊包鈔後路兩面受敵
傷亡員弁勇丁二千餘名軍械多爲賊擄覽奏曷勝憤懣統兵大
員全在謀定後動出奇制勝方能所向有功雷正綰於官軍進攻
金積堡時地係河套水草全無後路糧道旣爲賊匪分股阻截附

營溝渠又爲賊眾所掘水道被洩致官軍飢渴交乘兩次被堡外
伏賊包鈔後路究屬先事未能審慎致令全軍挫衄損折良多該
提督自請嚴議之處本屬咎有應得姑念該提督此次力行進攻
尙無退縮情事著從寬改爲交部議處嗣後該提督務當收集散
勇重整軍威力籌攻克金積堡爲陣亡員弁勇丁雪此憤恨上兵
伐謀總須以計畫爲先不可徒恃血氣之勇至漕道爲軍行要需
楊岳斌恩麟務當力爲籌解源源接濟不可稍緩須臾致令飢軍
譁潰並著楊能格趕緊就慶陽一帶迅速採買糧石設法運解分
濟雷正綰曹克忠各營不得推諉延緩致誤大局陣亡員弁勇丁
著雷正綰查明請卹將此由六百里諭知楊岳斌雷正綰並傳諭
恩麟楊能格知之○諭林鴻年奏暫移川滇邊界候撥餉需再圖
進取一摺林鴻年畱駐川省爲時已久見在滇省巡東事機順手

自應剋期前往辦理以慰該省士民之望林鴻年擬赴敘州地方暫爲駐紮相機節節規取所見尙是惟餉需無著自不能不藉川省協濟前經疊諭駱秉章隨時量爲接濟諒該督必已竭力籌畫川省見在剿辦黔匪固須寬籌餉項而林鴻年旣進規滇省餉需亦必不可少駱秉章總當力顧大局先行籌給銀數萬兩以後仍按月源源撥濟俾辦事不至棘手林鴻年卽迅速前進次第籌辦不得以待餉爲辭遷延觀望致干咎戾另片奏請將逾限之已革府州縣各員隨營效力等語著照所請所有已革徵江府知府朱鴻等三員均准其隨營效力以贖前愆儻不得力卽著林鴻年隨時參撤將此由五百里各諭令知之○于江南殉難知府瞿敬邦祭葬世職建祠湖北被戕知縣羅琳祭葬世職○辛未諭內閣昨據雷正綰奏官軍進攻金積堡敗挫自請嚴議當以該署提督從

前頗著戰功從寬改爲議處本日覽楊岳斌所奏甘省情形一摺始知雷正綰近來打仗既不如前勇往又不能約束兵丁申紀律沾染軍營習氣不自振作致有金積堡之敗深負委任咎有應得署固原提督雷正綰著撤去黃馬褂撤銷勇號並撤去幫辦軍務歸楊岳斌節制調遣以示薄懲儆再不知自愛奮勉圖功卽著楊岳斌嚴參懲辦○諭軍機大臣等本日據官文等奏楚省東西兩路防務同時喫緊布置情形喬松年奏近日軍情各摺逆捻自雉河解圍後分爲兩股一由亳州竄向永城一由亳州竄向太和經張得勝英翰分路追殺太和民團到處截剿殲斃甚多並經官軍將銅叉樓等圩攻破步賊埽除殆盡馬賊均經竄逸見據喬松年聲稱永城一股竄至開封所屬之太康縣太和一股竄近陳州之周家口等語惟上月二十九日已據吳昌壽奏到賊由太康扶

溝等處竄過許州直向西路撲至襄城郟縣雖經張曜陳國瑞兩軍跟蹤緊蹙已未能繞至賊前後股賴汶沆等續由太和邊境竄入淮南吳昌壽雖派李世玉等帶兵由省馳援陳郡亦恐落賊之後前經諭令喬松年派撥皖兵越境追剿著卽懍遵前旨迅派得力將士馳往豫境會合李世玉等將賴汶沆等續竄股匪合力追剿該逆日向西趨且前股張總愚等業已竄至襄郟後股賊匪勢必續向西趨意圖歸併喬松年不得以防賊回竄爲詞意分畛域能將賴汶沆等股匪越境剿除則該逆自無從回竄皖境至曾國藩身任統帥責無旁貸前經疊諭該大臣籌撥一軍兼顧晉省並令劉銘傳等軍馳赴豫省北路繞出賊前防賊竄越秦晉之路又令派撥馬隊馳赴豫境助剿復以賊去徐郡甚遠令該大臣酌量前進駐紮乃該大臣日久迄無奏報於近來皖豫軍情及各路如

何布置情形均未陳奏歷次所奉諭旨亦未答覆實屬疲玩因循
若欲藉此獲咎冀卸節制三省仔肩何以仰副朝廷倚任之重諒
該大臣公忠體國之心何忍出此鄂省黃麻羅田諸路官文已派
成大吉等軍扼守要隘著卽飭令嚴密防堵毋令汝甯股匪闖入
邊境並飭駐紮老河口隨棗等處各軍俟賊離邊稍近卽出境迎
頭截擊與豫軍合力夾剿官文等所稱與吳昌壽會剿之語總須
認真辦理不得有名無實徒事紙上之談吳昌壽亦當嚴督張曜
等將張總愚等股匪盡力追剿毋稍鬆勁並嚴扼賊匪竄赴秦晉
之路正在寄諭間據劉蓉馳奏逆匪由郟縣向西南大路圖竄魯
山南召等處請飭官文速撥重兵駐紮淅川荆子關一帶劉厚基
一軍因西路回氛甚熾未能卽赴潼關請飭吳昌壽防守鞏汜等
處等語賊騎剽疾異常既據獲犯供稱有窺伺鞏洛之意則虎牢

等處要隘並陝州各要路吳昌壽仍當豫籌嚴防並嚴扼黃河口岸毋稍疏虞劉蓉因雷正綰等軍爲金積堡回匪所挫逆勢猖狂鳳邠一帶邊防喫緊令劉厚基五營先行暫紮鳳翔惟東面潼商一帶空虛特甚殊爲可慮著卽迅飭劉玉興等軍速赴鳳翔替出劉厚基之軍星馳潼關東面之金斗關扼守並由該撫迅籌添兵馳赴商雒一帶嚴防要隘若專恃鄰省之兵代爲防守境外設被賊蹤闖入本境必致貽誤大局懍之慎之至鄂省兵力尙敷出境防剿之用與其專守本境以待賊至不若越境迎剿豫行扼截以固藩籬官文鄭敦謹務當速撥重兵馳赴三省交界之浙川廳荆子關一帶嚴密扼截俾賊眾不得闖入商雒鄖陽等處與豫省追兵兩面夾擊吳昌壽飭令派出之陳國瑞等軍繞前截擊杜其竄入秦晉之路均著迅赴事機不可延緩劉蓉因楊岳斌兵力單薄

甘省軍情甚緊請飭蔣凝學一軍赴甘助剿之處蔣凝學所部除
闡餉遣散外見存各營如能赴甘亦可稍厚兵力著官文酌量情
形辦理將此由六百里各諭令知之○諭喬松年奏本年捻匪竄
皖雉河被圍官軍防剿兼施不敷分布先後添募馬勇九百餘人
步隊九千餘人水勇五百餘人彼時急則治標不暇計及餉項見
在設防已久欠餉益多雖准留國藩撥給陳州存款銀五萬兩而
後難爲繼若非鉅款接濟終慮有飢潰之虞請飭江蘇等省籌撥
餉項各等語著李鴻章劉卹膏閻敬銘王榕吉文明等各將應解
皖省協餉儘力設法籌撥解濟俾供要需不准稍有延誤將此由
五百里諭知李鴻章閻敬銘並傳諭劉卹膏王榕吉文明知之○
諭楊岳斌奏陝甘軍務糧餉吏治民生大概情形並曹克忠接仗
失利各摺片甘省用兵日久而匪勢愈熾地方情形日益彫敝皆

由帶兵各員習氣太深地方大吏諸事廢弛種種情形實堪痛恨雷正綰曹克忠兩軍近因進剿金積堡失利弁兵傷亡頗多見在士氣新挫逆倭必致益張楊岳斌當責令雷正綰等申明紀律重振軍威再圖進取以贖前愆河狄一帶賊勢最重從前總以兵力不敷未暇兼顧楊岳斌見擬先剿狄河再圖西北卽著調撥各軍妥籌剿辦前因黎獻一軍進剿肅州賊匪兵力過單諭令林之望移軍助剿嗣又據恩麟奏調張華一軍赴洮州剿賊該兩軍見在行抵何處仍著楊岳斌酌量調派劉正高沈大興等所部淫擄焚殺經楊岳斌拏獲三人正法所辦甚是該二員何以拔營他徙並著查明參辦嗣後如有不遵調遣及縱勇騷擾情事卽著按照軍法懲辦庶幾壁壘一新於軍務方有起色定邊花馬池一帶時虞賊匪東竄並著與都興阿妥籌兼顧至該督所陳於軍務則先懲

擾害再汰疲羸於糧餉則先籌採買再議轉輸於吏治則先儆貪墨再振因循於民生則先去煩苛再謀招墾均能切中窾要該督受朝廷重寄惟當實力實心次第籌辦以副委任曹克忠此次進攻賊堡因無援失利情尙可原著免其議處前據莊浪城守尉慶志奏參恩麟袒護屬員東瞻秦砍傷兵丁玩誤餉楫並陶茂林所部之勇到處擾害等語著楊岳斌彙入從前交查各案一併查明具奏原捐著鈔給閱看將此由六百里諭令知之○諭各直省酌停例進貢品○予安徽陣亡協領密成祭葬世職○予甘肅陣亡總兵官周有貴等祭葬世職○壬申諭軍機大臣等吳昌壽奏豫省兩路官軍擊賊獲勝見飭進剿一摺髮捻賴汶洸牛落紅等由淮甯竄至西華紛擾扶溝臨潁及許州屬之秋湖栗園一帶疊經官軍進剿獲勝陳郡所屬已無賊蹤該逆由舞陽西去勢將與前

股句合捻匪張總愚等經張曜等由許州向南追剿該逆奔往襄城郊縣旋至寶豐魯山盤踞南裕交界之橫山神林大店等處並由葉縣入山我軍疊將橫山等處克復該逆聞風南遁逆匪蔓延豫省腹地勢甚鴟張亟須實力進攻爲一鼓殲擒之計著吳昌壽嚴檄張曜等軍務將張總愚等股匪就地殄除毋令竄入鄰省又成不了之局吳昌壽見由尉氏前赴許州卽著迅速前進居中調度毋誤戎機鄂豫壤地毗連該逆由豫而鄂俱係從前往來熟徑官文等前派成大吉等軍分路扼守卽著嚴飭各軍認真防堵毋令匪蹤闌入並著官文鄭敦謹抽撥勁旅以剿爲防迅速飭赴豫疆會同吳昌壽派出各軍協力夾攻迅殲醜類逆蹤離皖雖遠必須皖軍越境追剿方可制賊奔突以期聚而殲旃著喬松年懷遵前旨迅派得力將士馳赴豫境合力會攻皖豫軍情及各路布置

情形著曾國藩統籌全局妥爲調度隨時奏報以聞將此由六百里各諭令知之○諭孫長絨奏叛勇被擊竄逸已赴粵軍乞降見在籌防情形一摺叛勇與髮逆在吉祥墟接括糧食分派不均互相鬪殺既合復分叛勇竄長甯被剿遁往平遠進退失據遂向粵軍乞降經方耀收受計七千餘人見令前赴嘉應州石灰港聽候處置著恩麟郭嵩燾督飭方耀妥爲區畫其有家可歸者酌量遞解遣撤如係無業游民卽遣散亦恐復爲賊須分營安插令與官兵相輔而行不可稍涉疏虞致貽後患汪逆仍踞鎮平添造木柵望遠意在伺隙而動著卽督飭在事各軍設法攻剿務須四面兜圍毋令再有竄逸髮逆竄往老龍街有圖犯惠州之意此股見係何人勦辦卓興見在何處能否跟擊並著該署督撫責令迅速籌辦毋稍鬆懈左宗棠等當懷遵疊次諭旨飭令康國器等會同粵

軍將鎮平踞逆悉數殄除毋畱餘孽鎮平偏近江西之會昌長甯
孫長紱已令席寶田扼紮會長邊界並令婁雲慶等嚴防龍定南
安王開琳迅紮會長著卽督令席寶田等扼要駐守遇賊卽擊毋
稍大意將此由六百里諭知瑞麟左宗棠徐宗幹郭嵩燾並傳諭
孫長紱知之○命恩麟開缺聽候查辦以林之望爲甘肅布政使
楊能格爲甘肅按察使

候補按察使

○癸酉派戶部右侍郎董恂兵部

左侍郎崇厚辦理比利時國通商事務○甲戌諭軍機大臣等駱
秉章奏官軍進攻黔匪疊獲勝仗一摺官軍自攻克正安州城後
由松坎趨婁山關轉戰而前扼綏陽後路一面分兵由正安直進
以擊綏陽之前兩路夾攻劉嶽昭一軍連克綏陽西路之觀牛崗
杉壩並厚水金雞寨小白巖各處賊巢續將七寶寨回龍寺菩薩
廟等處賊營攻破殲戮殆盡其東路之磨壩蔡缸崗賊巢亦經李

家福一軍攻毀剿辦尙爲得手著駱秉章卽飭劉嶽昭等軍乘此聲勢速將綏陽城池克復疏通川黔道路並著勞崇光張亮基迅速派兵會同川軍合力夾擊將遵義一帶匪巢悉數掃除毋稍鬆勁此次出力員弁准駱秉章擇尤保奏將此由五百里各諭令知之○乙亥諭軍機大臣等成祿奏邊疆告急擬就見有兵力剋日西征請飭迅籌兵餉並河北賊匪竊集撥兵助剿各摺片據稱敦煌等縣告急擬統馬天祥趙德正二營及新募衛隊一營節節西向會合黎獻之兵規復肅州請飭楊岳斌籌撥糧餉軍火並撥兵替回川兵三營各等語前據楊岳斌奏黎獻一軍進逼肅州惟兵力過單驟難得手等語成祿若能率師西進與黎獻合兵一處規復肅州則將來大軍出關可無後顧之虞自是目前第一要著第該提督所領僅有三營合之鶴齡川兵亦不過六營見在賊竄蔡

家河鶴齡一軍腹背受敵成祿派令馬天祥等拔隊往援而自率
衛隊一營跟蹤繼進是此項兵力尙爲河北賊氛牽掣西征一節
仍屬紙上空談殊爲非計著楊岳斌迅派數營替回成祿各軍俾
得剋日西發並將軍火帳房等項妥籌接濟毋令缺乏成祿請飭
楊岳斌設立糧臺分局轉運供支之處並著該督設法辦理俾免
餉糈不繼之虞成祿聯捷仍當統領所部星速西行不得以待兵
待餉爲詞任意延宕雷正綰一軍新有金積堡之敗恐難分兵協
助且聞該營將驕卒情非力加整頓亦難壁壘一新前調劉正高
七營能否再調著楊岳斌酌量辦理至劉正高不候調度拔營東
去有無抗違規避情事卽著楊岳斌查明參奏成祿摺內有中衛
之賊竄擾大靖之語該處距涼州不遠河西三郡關繫緊要著楊
岳斌斟酌情形撥兵堵剿毋稍疏虞昨已明降諭旨將恩麟開缺

聽候查辦著楊岳斌將交查該藩司前後被參貽誤各節認真查辦據實具奏將此由六百里各諭令知之○以馬賊竄擾興京王明等下部議處○予杭州陣亡副都統關福祭葬世職○丙子曾國藩奏查捻逆西竄分爲兩路其向北路者爲張總愚任柱等酋由柘城太康扶溝洧川徑趨而西見聞將至汝洛其向南路者爲賴汶洸李允等酋由太和竄至沈邱蹂躪陳州周家口一帶臣已檄調直隸提督劉銘傳全軍馳赴周家口又添調烏爾圖那遜等馬隊同援陳州萬一兵力尙單再派周盛波托倫布兩軍助之周盛波步隊已令其進駐亳州就近援陳托倫布馬隊已飭其整頓赴豫矣至富森保達爾濟帕克巴札普等馬隊因人馬疲困槍械不齊非暫爲休息大加整頓難以赴敵臣本欲急赴徐州料理一切惟月餘以來淮河盛漲大小道路被淹擬俟晴久水涸乃可啟

程赴徐臣細觀賊情已成流寇官軍處處勢成尾追終無大損於賊臣擬於捻匪必經之途駐紮重兵如劉銘傳駐軍周口賊若回竄扶溝鄆陵卽自周口迎頭擊之張樹聲等駐軍徐州賊若回竄永城蕭碭卽自徐州迎頭擊之推之賊竄蒙宿則劉松山等自臨淮迎頭擊之賊竄曹單則潘鼎新自濟甯迎頭擊之變尾追之局爲攔頭之師以有定之兵制無定之寇庶幾漸有歸宿皇上如以臣議爲可採則於臣駐兵四處之外請旨飭下湖北河南督撫於豫之鞏洛宛鄧楚之隨棗黃麻各駐勁旅一枝重在攔頭迎剿不重在賊退尾追似亦制勝之策也 上諭軍機大臣等曾國藩奏張總愚賴汶沆等分竄情形與吳昌壽等前奏大略相同該大臣已檄調劉銘傳軍赴周家口又添調烏爾圖那遜等馬隊援陳並令周盛波一軍駐亳將托倫布等各馬隊整頓赴豫請飭湖北

河南督撫於豫之鞏洛宛鄧楚之隨棗黃麻各駐勁兵一枝攔頭迎剿等語所籌均屬周妥見在張總愚一股已竄魯山南召由葉縣入山向南奔竄賴汶洸等由舞陽西去勢將與前股句合吳昌壽已出省駐許州督剿著懷遵初九初十日諭旨嚴督張曜等認真追剿官文等迅派成大吉等軍扼守黃麻等處要隘務與吳昌壽會師合擊不得任令賊蹤闖入致滋延蔓曾國藩以劉銘傳等軍駐周家口徐州等處防賊回竄變尾追之局爲攔頭之師以有定之師制無定之寇固屬老謀深算惟賊趨西南一路陳州見無寇蹤豫省之兵甚形單薄若不迅籌遊擊之師協力追剿恐賊乘我寡未易得手劉銘傳烏爾圖那遜已到陳郡卽著飭令進至洛陽以西擇要駐紮賊來則擊以固山陝門戶易開倭周盛波等軍內著酌量調派一軍駐紮周口以資接替其托倫布富森保達爾

清帕克巴扎普等馬隊多起見在休患亦已數月著該大臣挑選精壯者分隊配齊馬匹軍械飭令前赴河南歸吳昌壽調遣以厚追師之力其疲病不堪者或卽遣撤或畱徐州陸續整頓以期一兵得一兵之用該大臣因淮水盛漲未能赴徐見屆秋爽水涸當可徐圖拔隊進紮徐州居中調度鈔錄查辦民圩告示各條皆救時急務卽著督飭委員悉心妥辦不得有名無實皖省無賊著喬松年飭英翰等軍赴豫助剿毋分畛域曾國藩另片奏徵休防軍索餉譚謀自請議處並請將唐義謨等分別懲處等語唐義謨代統唐義訓之軍任聽各營譚謀甚至毆辱大員實屬庸懦不職著卽革職提營審訊定擬皖南鎮總兵唐義訓請假歸葬久未回營實屬遲延羣泰階道金國琛假歸省墓遷延太久均著交部議處曾國藩自請議處之處著加恩寬免惟各營自霆營潰變之後紛

紛效尤此風斷不可長該大臣務須嚴密查辦懲一儆百不必稍
存姑息致貽後患將此由六百里各諭令知之○諭林鴻年奏請
飭催滇省協餉並會辦捐輸及請獎楊盛宗等各摺片滇省軍務
日亟餉項無出本省既無可自籌之法不得不藉外省捐輸協餉
以爲進取之謀四川原設滇省捐輸著駱秉章飭令川藩與林鴻
年行營藩臬兩司及總辦捐輸之蕭浚蘭等一體會印會辦仿照
川省援甘捐輸辦法以期鼓舞其湖北湖南山西三省見經林鴻
年派員前往設局勸捐並著官文鄭敦謹李瀚章王榕吉各飭藩
司查照四川藩司會同陝西委員勸辦之法一體舉辦庶捐務日
形踴躍至浙江江西廣東湖南四川山西粵海關等處積欠滇餉
合計在六百萬兩以上滇省嗷嗷待哺各該省豈容坐視著駱秉
章馬新貽孫長紱郭嵩燾李瀚章王榕吉師曾酌量緩急速爲籌

撥卽得十之一二以贍滇軍亦可以資接濟各該省關毋再置之膜外致誤事機昭通爲籌辦滇事要區楊盛宗楊先芝等均能卓著戰功該撫當妥爲籠絡駕馭使其奮勉圖功以資指臂該撫身爲滇撫屢催進紮昭通輒以兵餉爲詞昭通士民非不可用惟在該撫身履其地自可以資振作而勵同仇若遠居鄰省徒責他省之膜視而該撫已先畏難苟安朝廷亦安賴此封疆大吏爲耶將此由五百里諭知官文駱秉章馬新貽鄭敦謹李瀚章林鴻年郭嵩燾並傳諭孫長紱王榕吉師曾知之○曾國藩奏謝授曾國荃山西巡撫恩得旨山西防務緊要曾國荃到後正可督同陳湜籌辦一切仍著該大臣迅速催令起程北上毋稍延緩○丁丑諭內閣楊能格奏雷正綰調魏添應一軍相率進剿該臬司無從阻止致有挫衄實緣任重權輕不足以資節制且於各省咨催餉項亦

屬呼應不靈請另簡大員前來辦理等語所奏殊不成話楊能格以廢員擢用臬司命在慶陽辦理糧臺兼辦防務並准專摺奏事昨復降旨將其補授甘肅臬司不得謂之任重權輕如果雷正綰剝度無方該臬司何妨於事前參奏乃因魏添應兵敗既恐朝廷降罪復以慶陽糧臺防務辦理棘手思欲藉此息肩此等肺肝難逃洞鑒若不加以懲處何以杜規避而儆效尤楊能格著交部嚴加議處尋議應照規避私罪例革職得旨著加恩降爲四品頂帶革職畱任仍辦理慶陽糧臺事務○諭軍機大臣等楊能格奏官軍失利慶陽兵單請飭陝省防兵助剿並自陳任重權輕請另簡大員辦理各摺片楊能格因魏添應一軍經雷正綰調往助剿致有挫衄輒以權輕任重不足以資節制等詞曉瀆不已悻悻之意見於章奏該臬司以廢員經朝廷錄用並不力圖報稱輒敢藉端

諉卸寶屬大負生成見在雷正綰軍新挫復由韋州退紮預望城賊勢蔓延均距慶陽不遠籌餉籌防至關緊要該臬司尤當激勵士卒會集民團力圖戰守儻再意存推諉致有疏失必將該臬司從重治罪雷正綰既歸楊岳斌節制該軍敗後應如何訓派勁旅杜賊旁竄及慶郡喫重能否分兵兼顧之處並著楊岳斌妥籌策應毋誤事機劉蓉所派駐防定靖鄜州各營與慶陽聲勢不相聯絡著劉蓉飭令總兵楊得勝四營進紮鄜州之王家角合水之太白苗村扼要防堵與慶陽防兵相機截剿毋稍貽誤將此由六百里諭知楊岳斌劉蓉並傳諭楊能格知之○諭楊能格以廢員起用不思勉力報稱輒以任重權輕呼應不靈藉詞規避其爲不能得力已可概見本欲另簡大員替代惟慶陽防務方亟督餉事宜亦無熟手可以經理是以仍令暫行管理糧臺及慶陽防務楊能

格本係棄瑕錄用之員究竟能否勝任著楊岳斌詳細訪查據實具奏此外甘肅道府各員內何人可勝兩司之任何人可以辦理糧臺防務並著詳加考覈酌保數員候旨錄用將此諭令知之○撥山西銀二十萬兩分解伊犁及文麟軍營充餉○戊寅諭軍機大臣等閻敬銘奏水陸籌防情形並請令藩司暫行回省一摺黃運兩河防堵必須礮船分段扼守方可得力該撫既稱吳棠遣派來東之長龍舢板船隻於黃河水性駕馭合宜見復由東省續添數隻共計二十四隻並擬添製舢板十隻以資分布等語著卽督飭管帶將領認真巡哨總兵趙三元回浦購辦續添船隻卽著閻敬銘咨行吳棠飭催該總兵迅速購齊駛回山東以資統率周森藻舊帶礮船卽著畱於張秋渡口防守該處爲由運入黃要口務須實力巡哨不得以賊蹤較遠稍形鬆懈陸路西南邊境以濟甯

曹州爲扼要該撫所擬分派各營駐紮各路布置尙屬周密惟東省勇丁多係新募未經戰陣閻敬銘見駐兗州務當督飭各營將領認真訓練以期一兵得一兵之用不可有名無實漸就廢弛滕嶧蘭鄆一帶土匪仍須力加接捕務絕根株以清內患省城地方緊要丁寶楨卽著先行回省辦理本任公事並籌辦餉需以專責成其所統湘勇千名卽著閻敬銘酌量裁撤將此由五百里諭令知之○諭瑞麟郭嵩燾奏逆匪麇聚一隅見籌合力進剿一摺據逆汪海洋盤踞鎮平分築賊壘積糧自固爲堅守之計瑞麟等以賊勢合則兇剿易盡兵勢分則力薄難支所見甚是該逆自江閩遁入粵東其勢本已窮蹙若不合力會剿迅圖撲滅鋌走固屬可虞且此股一日不除則江閩防軍卽一日不能遣撤老師糜餉東南軍務終未了局左宗棠前僅派康國器一軍進紮粵境兵力究

嫌單薄卽著添派後路防軍剋日進發會同粵軍進規鎮平毋稍延緩孫長紱亦卽飭令席寶田等軍前赴粵境與閩粵官軍三面圍逼使該逆無路可竄以期一鼓殲除左宗棠徐宗幹孫長紱接奉此旨卽當迅速調派督飭各軍同時並進不得存此疆彼界之見意存觀望貽誤事機瑞麟郭嵩燾仍當督飭李福泰方耀等軍併力進攻務將此股賊匪就地殄除毋任再行他竄花旗賊匪與凍逆分股跽伏龍川長樂交界地方如果真心就撫亦須相機妥辦斷不可稍涉大意致貽後患霆營叛勇前據孫長紱奏稱已向粵軍乞降此次瑞麟摺內則稱汪海洋結霆營叛卒爲輔翼等語究竟霆營叛勇是否就撫仍著瑞麟郭嵩燾查明具奏甘肅綏甯鎮總兵黃武賢上年七月間賞假兩箇月回廣東原籍省親令其假滿赴任見在厯時已久尙未見該員赴任著瑞麟郭嵩燾查明

該員見在是否在籍催令迅速赴任毋稍遲延將此由六百里諭知瑞麟左宗棠徐宗幹郭嵩燾並傳諭孫長紱知之○諭德勒克多爾濟等奏移添官兵防剿沿邊竄匪並借銀籌給兵食一摺歸綏等處地方遼闊與甘省邊境毗連見在定邊花馬池一帶均有回匪盤踞沿途口隘防堵不可稍鬆德勒克多爾濟等見將磴口迤東之駐紮蒙兵調赴沿邊與伊克昭盟官兵在花馬池一帶擇要協防並將烏拉特三旗官兵三百名移紮磴口迤東另調烏蘭察布盟官兵二百名協同防剿所辦尙屬認真惟兵力尙嫌單薄必須添撥勁兵方足以資堵剿著都興阿穆圖善迅撥精兵數營出賊不意從間道疾馳至定邊花馬池一帶協同翁同書之軍實力剿洗仍一面佯攻甯夏使賊不疑該處係甯夏軍營後路糧運所關該將軍等必須迅速撥兵掃蕩方免延蔓楊岳斌身任兼圻

費無旁貸應如何分兵策應之處並著斟酌情形通盤籌畫不得顧此失彼曹克忠一軍係屬勁旅儻能權其輕重酌派前去尤覺可恃德勒克多爾濟等仍當就見有兵力勤加訓練嚴密巡防毋得稍涉大意蒙兵無管帶得力之員卽著桂成酌帶歸綏等處在防官兵若干前往蒙古地方會同貝子扎那格爾第等統帶蒙兵偵探賊蹤認真防剿桂成起程後員缺應否派員署理著德勒克多爾濟酌量奏聞至大同鎮官兵昨據王榕吉奏已選調一千名飭赴歸化城聽候興奎調遣等語卽著德勒克多爾濟等迅速迎提伏此項官兵到防貴成興奎隨時操演相機調遣以壯聲威兩盟蒙古官兵欠餉日久飢潰堪虞德勒克多爾濟等見將寄存哈密餉銀四萬兩借款支發口糧馬乾亦係萬不得已之舉著王榕吉卽將此次動撥銀兩如數籌解歸款以備巴里坤軍營提用其

歸綏兩城蒙古官兵應需餉銀並著王榕吉源源設法籌款接濟不得稍有缺乏該蒙古官兵器械如不齊全並著德勒克多爾濟等製備發給將此由六百里諭知都興阿穆圖善德勒克多爾濟楊岳斌桂成並傳諭王榕吉知之○裁烏魯木齊理事通判員缺○己卯諭軍機大臣等本日據伯彥訥謨祜奏稱家人頭等護衛額卜圖諾爾布家丁松阿里等向隨伊父僧格林沁軍營恩眷有年本年四月間僧格林沁在曹州追賊失事該家人止知顧惜身命以致家主陣亡雖因昏夜倉卒未能救衛究屬保護不力罪有應得業由國瑞移交山東巡撫擬罪請飭就地正法等語著閻敬銘親提該家人額卜圖等三名嚴訊確情按律定擬具奏前據國瑞奏副都統成保遇賊潰逃總兵郭寶昌不能救護主帥厥咎甚重屢經降旨將該員等革職交閻敬銘嚴訊確情從重定擬迄今

尙未據該撫審擬具奏並著閻敬銘迅速訊明懲辦毋稍寬縱將此諭令知之○賞科爾沁親王伯彥訥謨祜世襲博多勒噶台王號○庚辰諭軍機大臣等李瀚章奏遵旨裁撤東征局請酌留鹽茶二項歸本省局卡抽收其餘各物酌留四成作為協餉等語所籌尙屬妥愜本月初一日據劉蓉奏請飭撥湖南釐金協濟甘餉當經寄諭李瀚章斟酌情形儘能有裨國用無損民生卽將東征局釐金照舊抽收接濟甘餉數年俟隴省軍務肅清再行停止李瀚章此奏自係尙未接奉前諭鹽茶爲釐金大宗著照所請無庸議減全數歸併湖南本省局卡抽收其餘各色貨據稱擬於向收東征釐稅內一律酌留四成增寫本省釐票內作為協餉惟甘省兵多餉絀待用孔殷卽使以酌留之四成專協甘省尙恐爲數不多不足濟事著李瀚章仍遵前旨悉心籌畫尙能照舊抽收接濟

甘餉於西陲大局自有裨益儻情形實有窒礙或局面係屬已成卽著將鹽茶兩項及各色貨物酌畱之釐金儘力解甘俾該省得此有著之款可收實效萬勿稍分畛域致誤師行將此由四百里諭令知之○辛巳諭軍機大臣等前因滿慶恩慶奏訊明造意糾奪已革總堪布人財脅眾拒捕之首犯吐多卜降巴請卽在藏正法當經諭令俟福濟景紋到藏後再行請旨辦理茲復據滿慶等奏以福濟業已奉旨回旗景紋又無自鑪出口確信未便使訊明要犯久稽顯戮等語此案雖經滿慶等訊明確情惟前既有令福濟景紋查辦之旨若不候訊結先行正法恐無以折服該犯之心見在福濟雖已回京而景紋前次奏報已行抵裏塘不久當可到藏仍著滿慶等將吐多卜降巴妥爲羈禁不得稍涉疏虞並著景紋於抵任後卽親提研訊請旨辦理將此各諭令知之○壬午諭

內閣前據崇實駱秉章奏查覆降調編修蔡壽祺被劉蓉參奏在四川省時招搖各款一摺當經諭令原派王大臣華豐等查覈辦理茲據華豐等會同查覈並訊明蔡壽祺供詞定擬具奏此案蔡壽祺雖查無私刻關防擅調鄉勇及收招匪目等情惟以丁憂人員各處游行不卽回籍守制且在四川任意逗留干預徵調團勇公事其爲不安本分已可概見該員前於咸豐十一年間經署四川總督崇實以該員早經服滿仍寄寓省城並戴用四品頂帶屢次屬爲吹噓凡事干預招搖又以臺諫中不乏交識等語誇張聳聽並倡言募勇等款參奏曾奉 文宗顯皇帝諭旨將該員勒令回籍不准在四川逗留欽此見據華豐等將崇實駱秉章覆奏各節查覈訊供請將蔡壽祺按照罷間官吏在外干預官事杖八十律擬以杖八十該員身列清班不知檢束奏請卽行革職等語蔡

壽祺著照該王大臣等所擬卽行革職仍遵 文宗顯皇帝諭旨

勒令回籍不准在外逗畱招搖滋事陝西巡撫劉蓉於奉旨明白
回奏之件語多過當有乖敬慎且於記憶未清之語率行入奏著
交部照例議處尋吏部議上劉蓉應比照言官條奏失體降一級
調用私罪例降一級調用毋庸查級紀議抵從之○諭軍機大臣
等明緒奏伊犁被圍甚急無餉無糧萬難撐拄一摺據稱回匪攻
陷巴燕岱城後兇燄愈熾連日圍撲大城經明緒督率兵弁盡力
堵禦屢次獲勝無如半載有餘軍餉分文不到見在羅掘罄盡縮
食減糧不過苟延目下情形萬分危急等語覽奏殊深焦灼前據
廣鳳等奏將所存伊犁餉銀五萬兩交伊犁差員三音布等領解
於閏五月十六日自科起程出俄國臺站行走計期應已解到但
杯水車薪仍恐不濟於事所有本月十五日諭令王榕吉將本年

應解京餉內劃撥銀十六萬兩著王榕吉迅速籌解不得稍有遲誤並著德勒克多爾濟遵照前旨於此項餉銀到城時趕緊派員轉解科布多卽由廣鳳奎昌察看情形或仍照前次運道由俄國卡倫行走經過烏里雅蘇台地方卽著明誼等派委委員接解轉運以利遄行明緒得此鉅款務當激勵軍士奮力堵剿將近城賊壘次第掃除肅清邊境方爲不負委任成祿聯捷等軍曾否拔營前進著楊岳斌催令該提督等迅由肅州轉戰出關將關外各城踞匪痛加剿洗牽制賊勢亦可稍紓伊城之急如成祿等兵力不敷並著楊岳斌添派勁旅攻取肅州俾出關軍隊後路疏通剿辦更易得手前諭駱秉章將原撥新疆餉銀二十一萬兩解交陝甘總督就近轉交成祿聯捷等應用此項餉銀係該提督等出關剿賊亟需之項駱秉章素顧大局諒必剋日飭司批解以濟要需將

此由六百里諭知明緒賂秉章楊岳斌德勒克多爾濟明誼麟興軍林敦多布廣鳳奎昌並傳諭王榕吉知之○癸未諭軍機大臣等楊能格奏慶防官兵會攻金積堡失利並見在賊情屬令雷正綰穩慎進取各摺片雷正綰金積堡之敗屢經都興阿雷正綰楊岳斌先後入奏本月十五日覽楊能格所奏魏添應一軍經雷正綰調往助剿以致失利雷正綰由韋州退至預望城距慶陽不遠該臬司此次所陳各情係在前次奏報之先該匪竄至吳慶鎮後日夜紛竄掠糧距慶郡八九十里存城之勇不過數百人設被該匪乘虛窺伺關繫非輕著楊能格仍遵前旨就見有兵力拊循激勵會合民團實力防守毋稍疏懈其陝省所派駐紮邠州之楊得勝四營著劉蓉仍遵前旨檄令進紮邠州之王家角合水之太白苗村會合慶陽防兵相機扼截以期聲勢聯絡庶剿辦較易得手

雷正綰新挫後所部零落不成隊伍尙須收集訓練蓄養銳氣方可再圖進攻雷正綰既歸楊岳斌節制調遣一切進止機宜卽著該督酌量調度穩慎進取毋任輕率失事再蹈從前覆轍楊能格另片奏請催慶陽餉銀等語已諭令駱秉章等迅速撥解此項餉銀行抵陝境如道路業已疏通卽可徑解慶陽糧臺無庸先交陝西藩庫再行轉運以免紆折其陝西應解慶陽糧餉仍著劉蓉妥速籌解毋令缺乏將此由六百里諭知楊岳斌劉蓉並傳諭楊能格知之○諭本日據聯捷奏密陳甘省北路見辦回務情形一摺據稱雷正綰辦事任性所部勇丁率多驕縱貪殘前次克復固原黑城子半角城等處皆係回眾獻城攻拔預望城亦藉降回之力該提督每入一城一寨輒凌虐降回縱勇擄掠婦女貲財卽本身亦不免此等情事既不能力誅頑梗又不能綏撫善良降眾寒心

叛回側目以致金積堡乞降之眾恐勇丁入堡蹂躪竟致臨時反
覆各等語以上所陳該提督貪財漁色各情如果屬實於軍務大
有關礙雷正綰本有交查案件卽著楊岳斌彙入前案確切查明
據實具奏毋稍徇隱據聯捷奏稱該提督所部勇丁爲數甚多甘
省產糧甚少不敷食用轉瞬秋冬飢寒交迫譁潰堪虞等情此項
勇丁雖經潰退楊岳斌仍當督飭該提督選擇精壯認真訓練俾
成勁旅以資攻剿其淫掠滋事勇丁卽應隨時遣撤免致再生枝
節雷正綰一軍前已有旨交楊岳斌調遣並著斟酌情形妥籌辦
理聯捷另片奏雷正綰營中三四五品頂帶翎枝皆由該提督任
意賞戴實屬專擅等語著楊岳斌一併查明具奏原摺片均著鈔
給閱看將此諭令知之○伊犁參贊大臣聯捷奏追辦會甯竄匪
移軍進紮安定得旨卽將安定一帶賊匪迅速掃蕩仍遵前旨會

同成祿之軍前赴肅州一帶節節剿洗以期廓清西路毋稍稽延又奏遵旨張貼謄黃將回匪分別剿撫批具奏各情已悉惟回匪屢以乞撫爲緩兵之計聯捷仍應會同楊岳斌分別良莠相機妥辦不可輕率從事○甲申諭內閣勞崇光等奏官軍克復大定府城請將出力陣亡人員分別獎卹一摺貴州遵義號匪竄陷黔西州後於上年十一月間分股闖入大定府城經勞崇光等檄飭鄧爾巽等帶兵馳往集練會擊先後殲賊無算本年閏五月間署提督趙德昌等收復黔西州城乘勝進規大定會合鄧爾巽等分路進取該匪出城抗拒官軍合力兜剿賊眾收退二十七等日趙德光在城外塔山紮營斷賊糧道趙德昌等復督隊圍攻賊勢窮蹙六月初八日鄧爾巽分軍設伏並派莫雲青等同趙德昌等在西門截殺趙德光率眾斫開東門麾軍並進賊猶拌死抵抗官軍分

投掩殺餘匪狂奔奪獲旗幟器械無數救出難民一千餘名當將大定府城收復其由瓢兒井來援賊眾亦經該文武派隊躡擊擒斬甚多勦辦尙屬得手所有尤爲出力之總兵趙德昌趙德光均著交軍機處記名遇有提督缺出儘先提奏○左宗棠徐宗幹奏康國器一軍進駐嘉應所轄松源地方擬會合高連陞等軍由巖前進規鎮平汪海洋老巢謀報賊將取道武平以竄江西康國器改由三溪口以進高連陞遂率五營扼紫中赤飭魏光邴等四營與黃少春所部扼紫巖前劉清亮所部扼紫下壩閏五月二十日各出隊至分水坳見有賊數百築卡踞守高連陞黃少春當飭各營分左右兩路鈔擊自率魏光邴等由中路進擊該逆見閩軍驟至倉皇遁走官軍乘勢追殺行至坳口因山徑險仄不便窮追將賊卡踣毀收隊而還賊仍回竄鎮平各營正擬進勦忽探汪逆分

撲嘉應州城石峯徑之保字營白渡之升字營均被賊圍攻營官
林保等僅以身免官軍退紮嘉應賊氛遂蔓延白渡新鋪墟一帶
州城岌岌二十一日康國器改赴龍牙二十二日派隊由嵩山一
路哨探正與賊遇小有斬擒二十三日康國器督飭各軍分路迎
擊擒斬二百餘名該逆棄壘竄回鎮平立將白渡新鋪墟一帶賊
壘賊卡悉數平毀汪逆詢知江西粵東邊界防兵甚多慮難竄越
仍思由閩邊偷竄江西六月初三四五等日賊由鎮平逾分水均
初六日出撲巖前官軍營盤賊眾約三萬餘分股撲豬股均官軍
營盤賊眾約二萬餘高連陞黃少春等軍分路迎擊陣斬無算賊
眾見兩路皆敗無心戀戰亦卽卻退高連陞追至分水均撤隊初
七日賊伏踞不出初八日汪逆復糾僞佑王僞揚王僞東平王等
各賊黨及由江楚在粵新附之叛卒仍踰分水均而來人數尤多

謀報各賊裹兩日糧以隨僅畱偽陪王譚富守鎮平城誓必破此
關卡取道武平汀州以竄江西高連陞黃少春登高望之見汪逆
出分水坳卽揚旗列布嶺口令各賊分起排列或隱或見官軍知
其將誘我窮追逞彼鈔截之計也偃旗息鼓佯若不知比賊逼近
遽令排礮轟之賊卽駭奔高連陞黃少春傳令躡蹤追擊僅擒斬
落後賊百數十名該逆敗入分水坳卽竄回鎮平縣城先後斃悍
賊一千數百名生擒百餘名查鎮平險瘠異常賊難久踞汪逆敗
竄之餘猜狠日甚前殺侍逆之黨李元茂等自是賊中益相猜貳
賊目向附侍逆者多不直之僞陪王譚富等陰遣其黨赴康國器
營輸誠其機頗有可乘惟此賊旣未能就廣東境內殲滅終恐遂
其竄越江西本謀見在高連陞黃少春駐營巖前中赤劉德亮駐
營武平下壩均距鎮平數十里聲勢尙爲聯絡道員張恆祥帶所

部由上杭移紮高梧遊擊賴長帶所部移紮永定互爲犄角而劉典一軍則仍駐汀州濯田一帶相機應之臣等自當隨時調度以期兼顧至力戰陣亡之副將湯復春等相應開列懇恩飭部分別議卹上諭軍機大臣等汪逆盤踞鎮平復分撲嘉應州經康國器督軍援剿將白渡新鋪墟一帶賊壘賊卡平毀該逆復以江西粵東邊界防兵甚多圖由閩邊分竄江西遂分兩大股出撲巖前豬股坳官軍營壘連日經高連陞等軍奮勇血戰計斃悍賊千數百名該逆仍退回鎮平盤踞所奏情形較廣東前奏更爲詳盡鎮平地方險瘠該逆勢難久踞終必遂其竄越江西之謀康國器一軍由嘉應州一路進剿本嫌單薄此時賊旣擬由武平竄江高連陞黃少春駐紮巖前中赤之師劉清亮駐紮武平下壩之師均距鎮平僅數十里正可迎頭進擊就地殲剿以杜其入閩之計且汪

逆猜很日甚驅除異己賊目多不附之其勢自將內訌正可乘機就其遺黨輸誠者使之內應尤易得手著左宗棠卽飭高連陞等得勝之師移營進逼鎮平與康國器軍及粵省官軍兩路夾擊毋失事機其武平上杭各路應防處所仍著該督厚集兵力節節布置毋令旁逸並著瑞麟郭嵩燾令李福泰督方耀等軍併力進攻以成合圍之勢其江西之會昌長甯等處孫長紱已飭席寶田等扼要嚴防著仍遵前旨飭令前赴粵境與閩粵官軍三面圍逼以期一鼓殲除毋稍觀望福建興泉永漳等處民俗獷悍動輒乘機蜂起經左宗棠督飭地方各員將永春同安興化龍溪各屬匪徒剿洗平毀巢穴辦理甚屬認真仍著左宗棠徐宗幹飭令地方文武儘力接捕毋畱餘孽將此由六百里諭知瑞麟左宗棠徐宗幹郭嵩燾並傳諭孫長紱知之○諭勞崇光等奏官軍克復大定府

戒一摺大定府城攻克賊蹤由黔西等處分竄復有瓢兒井援賊數千伺隙欲逞著勞崇光張亮基裕麟嚴檄趙德昌鄧爾巽等實力進攻將黔西遵義等境踞賊次第掃除並飛飭川省援黔之劉嶽昭等軍合力夾擊進殲醜類滇省軍務情形甚爲緊要勞崇光應卽凜遵疊次諭旨馳赴滇省扼要駐紮將軍務地方各事宜次第妥辦以副委任不得藉待餉爲詞再稽時日將此由六百里諭知勞崇光張亮基並傳諭裕麟知之○左宗棠等奏沈葆楨患病未能卽赴江西得旨卽傳知沈葆楨趕緊調理一俟稍愈卽行起程前赴江省督辦防剿事務又奏遵查臺灣逆匪陳啞狗實由總兵曾元福生擒正法前署提督林文察時相距較遠遽以傳聞入告以致奏報歧異報聞○以王德榜爲福建布政使鄧廷枏爲福建按察使

由興泉永道遷

○予貴州陣亡副將賈必祥福建陣亡副將湯

復春等祭葬世職○予湖南殉難知縣李右文趙榮祺建祠○予甘肅殉難教諭馬賓揚祭葬世職○乙酉諭軍機大臣等駱秉章奏籌撥滇餉及諸將道員仍畱川省並探聞貴州知縣勒派團民各摺片四川籌辦滇省惟唐友耕劉嶽昭兩軍見在劉嶽昭克復正安昨復據勞崇光等奏報克復大定府城唐友耕分布江綦要隘一俟攻拔綏陽進解遵義之圖將大定一帶肅清則川黔邊境既固該兩軍即可合剿○圖滇事緩急情形自應如此辦理劉嶽昭入黔境後連戰皆捷該藩司迅速進兵趕合進兵滇境其川黔以備不虞至滇餉一項軍火不下六萬餘

駱秉章奏唐友耕劉嶽昭兩軍每月餉
滇後仍由川省支發此外林鴻年別無

兵勇其在川收捐及他省協撥儘可供零星用款而川省入不敷出勢難以一省供兩省之用固屬實在情形惟滇省瘠苦之區如川中力量但可多籌仍著駱秉章酌量寬爲撥解以期力支危局林鴻年已擬進紮川滇邊境見復由駱秉章籌給行費一二萬兩自不能再藉口餉需遷延不進卽著該撫迅速進駐昭通就地先行籌畫布置一切與勞崇光和衷商辦方不負封疆之寄不得再行坐待唐友耕等軍擁護前進始行起程懍之四川候補道楊重雅既熟悉川省地方情形且有經手事件著照該督所請准其仍畱四川毋庸赴滇差遣貴州署仁懷縣知縣洪姓任聽書吏蒙蔽糾約會匪王么大任志邦等數百人在寨壩折毀民房接拏糧戶勒派需索民不聊生覽該團民賀廷羽等所呈該知縣告示殊堪駭異該知縣既稱詳明各大憲何以該撫等於此等劣員不行參

奏竟毫無聞見至此該知縣究竟何名著駱秉章會同張亮基裕
麟迅卽將其撤任確切提訊從嚴參辦不准該撫等稍涉回護將
此由五百里諭知駱秉章張亮基林鴻年並傳諭裕麟知之尋裕
麟奏遵查署仁懷縣知縣洪用勲前因辦理不善業已撤任查辦
其糾約會匪接拏糧戶尙未據紳團具控該縣剿賊所需軍糧飭
令就地勸捐不准苛斂詎該員藉端抑勒並因派捐不遂竟敢大
張告示將丁五甲賀張楊三姓降爲梗戶頑民實屬任性橫行應
請革職查辦從之○諭前因滿慶等奏請頒給諾們罕羅布藏青
饒汪曲敕印諭令理藩院查案妥議具奏茲據奏稱羅布藏青饒
汪曲並非曾經轉世亦非奉特旨頒給覈與成案均未相符惟查
西藏商上原有承辦藏務掌管黃敕額爾德蒙額諾們罕印信一
顆歷任掌辦商上事務呼圖克圖等均經鈐用嗣經西甯辦事大

臣將此印呈交到院今羅布藏青饒汪曲已經協理商上事務可否即將掌辦商上印信頒給等語卽著照理藩院所議將掌辦商上印信先行解交四川總督衙門著駱秉章會同崇實暫行封存著景紋詳細察看確查羅布藏青饒汪曲如能勝任服眾堪以發給商上事務之印卽據實奏聞再行就近派員赴川承領此印轉交諾們罕羅布藏青饒汪曲祇領仍俟達賴喇嘛及歲接任時立予撤退所遺掌辦商上印信卽由該大臣等會同達賴喇嘛封存商庫以符定制將此各諭令知之○丙戌諭軍機大臣等官文等奏髮捻各逆分偏楚境見在分軍防剿一摺吳昌壽奏賊匪分擾汝宛剿辦情形並將剿辦匪團之文武各員參處各摺片前股竄豫捻逆由裕州唐縣趨向鄧州復折回西北竄近鎮平之賈宋一帶張曜等督軍追剿疊有斬獲惟賊蹤剽疾異常奔突靡定吳昌

壽見飭張曜等軍合隊緊追並飭譚仁芳由寶豐一帶直出鎮平迎頭攔截務當認真扼堵不可令其竄入秦楚境內尤不可任其乘間折竄汝洛致秦晉之防又形喫重並著官文鄭敦謹飭令楊朝林之軍力顧鄖防其襄樊光化隨襄等處防軍卽由官文等飭令統帶各員嚴密堵扼並檄姜玉順速赴新野會合豫軍出境迎剿其續竄豫境之後股賴陳牛李各逆由西平竄至遂平上蔡汝陽等縣攻破民寨多處經豫省副將王文行等追剿並飭參將黃見駐許昌居中調度著卽飭令王文行等乘勝追剿並飭參將黃祥興統帶陳國瑞所部各營拔隊由鄖城進剿毋令該匪紛竄鄰境湖北麻城黃安等處逼近賊氛官文等見已派成大吉一軍移紮孝感就近策應並令梁洪勝暫紮岐亭著卽督令該將士等實力堵截以固邊防俟逆匪全股趨有定向楚北邊防稍鬆卽飭鄂

師全行出境會合豫軍四面兜剿以冀盡殲醜類官文等所陳堅壁清野之法實爲剿辦流賊要著務當實力奉行不得有名無實豫省賊氛日熾兵力較單劉銘傳一軍仍著曾國藩遵奉疊次諭旨飭令迅速繞前截剿先將賴陳等股會合蔣希夷各軍剿除淨盡再行馳赴汝洛一帶扼賊竄越秦晉之路不得再事延緩致誤事機陳國瑞在郟城剿賊之後所部散去五營又久病未愈未經出隊該總兵帶隊殺賊素稱勇敢仍著吳昌壽於妥爲羈勒之中加意籠絡令其奮勇立功張學醇與陳國瑞有舊見已赴豫吳昌壽可卽令該員勸諭必當倍加踊躍也商水縣扶蘇寺寨眾將差赴湖北之協領依勒吞等截入寨中並行旅盤費文書路票一併裹去旋將依勒吞等殺害此事殊堪髮指若謂疑係邊馬邀截入寨而該協領等有文書等件可憑卽或未敢遽信亦應送交地方

官查明辦理乃竟敢擅自殺害三品大員已屬目無法紀該縣知縣聯魁責令寨首交出正兇復敢散出傳帖糾約各寨共相抗拒迨該縣邀同參將蔣希夷帶兵彈壓再三開導該寨膽敢開礮擊傷勇丁不少蔣希夷進兵圍寨始據縛獻兇犯八名復經蔣希夷入寨接殺要犯二十餘名此等莠民豈復可以理諭該縣等臨之以兵係屬正辦卽蔣希夷聽信該縣之言移兵圍寨亦豈得謂之冒昧乃吳昌壽旣稱該寨情同叛逆又請將聯魁等分別撤任摘頂議處實屬辦理錯誤自相矛盾所請著不准行此事是否卽係王崇德主謀抑另有從中主使之人所縛獻之八名是否的係兇犯此事始末詳細情形仍著吳昌壽查明據實具奏此外幫同抗拒之首要各犯卽著吳昌壽查明拏獲並見獲各犯一併從嚴懲辦如果查有謀叛情形卽著用兵剿除免貽後患其安分良民仍

當分別撫綏用資觀感將此由六百里各諭令知之○諭張之萬奏上南廳汛工程萬分喫重見督道廳竭力搶護一摺據稱南岸上南廳鄭下汛十堡一帶無工處所因河勢圈注塌埽潰隄情形緊要正在搶辦間風雨頻番全河溜勢側注湧激趨洶非常湍急以致該工新鑲埽工先後墩墊隄身同時匯塌隨鑲隨墊頂僅存丈餘見在親督道廳竭力搶護並催藩司撥款接濟各等語該廳河岸逼近省垣工程甚關緊要見在河流側注埽工塌墊僅存一綫長隄情形萬分危險張之萬身任河督責無旁貸卽著督飭道廳營汛各員弁實力搶護毋稍疏懈該廳險工疊出需款浩繁卽著吳昌壽嚴飭藩司迅速籌款接濟以重要工將此由四百里各諭令知之○諭王榕吉奏回逆擾及鄜州晉省西路邊防喫重擬卽親往布置並將分防隘口繪圖呈覽一摺陝省鄜州一帶旣

經告警晉省蒲州府屬之榮河等縣絳州所屬之河津縣與陝境均止一河之隔自應實力嚴防王榕吉見令和昌楊寶昌李慶朝等添兵益礮前往西路協力助守俟陳湜到省後卽先赴西路次赴南路相機籌辦惟該省沿邊周圍著名要隘大小五十六處著名渡口大小六十三處通共防兵不及一萬未免地廣兵單該護撫惟當確探賊蹤何路喫緊卽將距賊稍遠之防兵調集一處併力防剿庶移緩就急兵力不至過形單薄至邊外民國能否助防蒙古官兵是否足恃並著德勒克多爾濟隨時察看認真訓練聯絡民團以壯聲勢不得粉飾因循有名無實王榕吉另片奏新任臬司陳湜素稱知兵見在奉旨辦防必須有得力之兵供其指揮方能調度合宜請將撥赴甯夏之楚勇一千調回晉省等語此項楚勇如能調回山西歸陳湜統帶可收兵將相習之效著都興阿

酌量情形妥籌調撥近日甯夏戰狀若何久未奏報並著都興阿
隨時馳奏將此由五百里諭知都興阿德勒克多爾濟並傳諭王
榕吉知之○予四川陣亡道員黃純熙建祠○丁亥雲南巡撫林
鴻年奏報起程日期並陳川餉未撥進止兩難得旨著懷遵前旨
迅赴昭通一帶相機籌辦兵餉一切業經疊諭駱秉章設法協撥
該撫惟當與之和衷商榷妥籌辦理○戊子諭軍機大臣等單懋
謙奏遵旨馳赴興京詳查賊匪滋擾情形一摺所稱本年四月間
馬賊由鐵嶺竄至八家子一路焚掠出邊復於五月間突至新泉
堡勒索鋪戶搶劫永福當本並竄入 陵街官兵與賊接仗屢被
擊敗搶去槍礮火藥等件焚毀民房數百間等情與御史張觀鈞
原奏大略相同較之玉明等七月十三日覆陳更爲詳盡玉明身
爲將軍委任甚重寶珣德椿均有地方之責任令賊匪橫行擾及

陵寢重地殊屬不成事體見在該匪由威遠堡竄出往花園一統河等處藏匿賊首王洛疙疸顧洛疙疸徐占一霍彪子等俱未緝獲捕務廢弛已極王明等若不知愧知奮力圖振作自問當得何罪著該將軍等嚴飭地方文武員弁盡力搜剿務將賊首王洛疙疸等悉數弋獲餘匪一律殲除以靖地方而衛陵寢嗣後如再有匪蹤竊發一經訪聞或被參劾定將王明等從重治罪決不寬貸將此由四百里各諭令知之○諭楊岳斌奏酌量近日情形一摺雷正綰等軍在金積堡挫敗後都興阿等規取甯夏見仍相持不下賊勢負隅如前甯靈等處一日不克則都興阿穆圖善全軍俱爲牽掣該將軍等督師進攻甯夏閱時甚久雷正綰曹克忠等軍均萃於東北一隅兵力亦不爲不厚乃曠日持久師老無功雖疊據奏報業已進紮城根並時獲勝仗而甯夏郡城總未攻拔

似此頓兵不進觀望遷延亦安望其恢復各城次第肅清疆圉耶
著都與阿穆圖善懌遵疊次諭旨激勵將弁將甯夏郡城速圖規
復其靈州等處賊匪並著以次掃蕩迅殄逆氛儻再糜餉老師毫
無成效該將軍等豈能當此重咎耶關外地方糜爛匪勢日張亟
須添兵協剿以資厚集著楊岳斌傳知成祿聯捷令其統率所部
星速出關毋再畏難苟安節節耽延致負朝廷委任楊岳斌務當
統籌全局於各路防剿機宜妥爲布置將近省一帶逆匪先圖撲
滅以固省防再行分路剿辦以期隴省軍務日有起色另片奏參
縱勇殃民之總兵劉車龍等本日已明降諭旨將劉車龍劉正高
照所請分別革職嚴議矣據該督參奏各情殊堪痛恨著楊岳斌
將該已革總兵等嚴行懲辦以肅軍律其犯事勇弁並著飭令雷
正綰趕緊查辦按律嚴懲毋任一名漏網劉正高等潰勇見往東

南逃竄著楊岳斌嚴檄沿途地方官嚴密防範並飭帶兵員弁實力堵禦毋令滋生事變貽害鄰疆將此由六百里各諭令知之○諭楊岳斌奏甘省防剿喫緊必須得力人員各赴實任請飭安肅道蔣凝學鞏泰階道金國琛迅速赴甘以重職守等語蔣凝學因勇潰未能赴豫防剿曾有旨交官文差遣嗣因劉蓉奏甘省軍情甚緊請飭蔣凝學一軍赴甘助剿復諭令官文酌量情形辦理茲據楊岳斌奏稱已札飭該員另選壯勇千人赴甘以資調遣著官文迅飭蔣凝學統帶所部星夜赴甘不得稍有遲延金國琛假歸省墓見已回營其所部勇丁於案餉案內有無應行查辦之處著曾國藩李鴻章迅卽查明飭令金國琛將部勇分別撤畱星速管帶赴甘助剿將此由五百里各諭令知之○己丑諭軍機大臣等萬青黎卞寶第奏馬賊聚眾入口請通飭嚴拏文謙奏馬賊竄薊

籌辦剿捕並擬派兵丁梭巡大道各摺片覽奏殊堪駭異直東地面間有馬賊竊發不過三五成羣及十餘人夥劫行旅從未有聚眾至一二百名在畿輔近地滋擾之事茲據萬青藜等奏稱本月二十等日有馬賊二百餘名由遵化玉田竄入寶坻縣境該縣會營督兵迎擊衝入賊內被裹把總劉永勝亦被槍傷經民團等夾擊賊始往東南竄逸二十四日竄入薊州境屬之邦均一帶游駛距隆福寺不過三四十里該匪膽大橫行殊堪髮指已諭令神機營酌派弁兵星馳前往剿捕著劉長佑嚴飭通永鎮督兵會剿並著萬青藜卞寶第督率地方文武就見有兵力激勵民團合力兜剿務將此股賊匪悉數殲除毋令一名漏網崇厚見在大沽海口著先派天津鎮帶兵出城察探賊蹤相機迎擊並著崇厚將經手事件趕緊妥辦應否親自督兵候旨遵行惟賊蹤飄忽靡定一聞

官兵出擊難保不竄逃出口暫行踞伏長善連成徐廷楷均有稽查關隘之責著各督飭所屬弁兵認真堵禦截賊歸路毋令出口如該副都統等防禦不力任令該匪出口遠颺將來查明必當從重懲處並著嚴密巡查不准再有續行滙入各口蔓延爲患隆福寺 暫安殿旗綠兩營守護兵不滿百文謙見派中軍遊擊立祥帶兵五十名前往駐守會同防範著奕劻載岱文謙並察杭阿等督飭守護弁兵晝夜巡防本日復諭神機營酌派官兵前往守護以昭慎重並著劉長佑速飭通永鎮派兵數十名會同文謙所派之兵自通州至薊州大道聯絡巡緝遏截賊氛至該匪聚集至數百人之多平日窩藏之所亦必不少此次執持槍礮竄入內地係由何路經行何人暗地號召著各路帶兵大員於拏獲賊匪時嚴詰該匪由何口而入頭目共有幾人窩藏共有幾處據實詳細奏

聞本日有旨諭知步軍統領等衙門力行保甲稽查奸宄其京城外順天府直隸所屬地方並著萬青藜卞寶第劉長佑嚴飭各屬一體力行保甲以清伏莽整頓團練以輔兵力不准虛應故事有名無實將此由四百里諭知奕劻載岱察杭阿等萬青藜卞寶第劉長佑崇厚文謙長善連成並傳諭徐廷楷知之○諭本日據萬青藜卞寶第文謙各奏馬賊聚眾入口糾黨至二百餘人擾及遵化玉田薊州寶坻一帶經官兵前往剿捕該逆膽敢執持槍械接仗拒敵猖獗異常覽奏曷勝詫異馬賊闖入內地竟至數百名之多爲患何可勝言且薊州一帶密邇隆福寺本年奉安山陵爲期已迫似此寇盜充斥尙復成何事體玉明身任盛京將軍平時於地方盜賊公行一味粉飾實堪痛恨昨因單懋謙馳奏查悉興京馬賊滋擾情形已降旨將玉明寶珣德椿交部議處本日復降

旨將王明開缺以恩合署理盛京將軍其吉林將軍仍令阜保暫行署理並諭神機營派撥勁兵迅卽前赴薊州一帶會同直隸順天府所派弁兵協力勦捕以期淨盡恩合前曾屢次帶兵勦賊甚爲得力見以盛京緊要爲地擇人該將軍務將地方捕務事宜力加整理並卽揀選精練妥籌策應如馬賊被勦逸出關外卽當實力兜圍聚而殲旃無任漏網該將軍如已起程前赴吉林無論行抵何處卽著趕緊折回盛京以資控制阜保見有查辦巴爾虎爭界事件如已起程亦著趕緊折回吉林署任以重職守王明著俟恩合到任後卽行來京聽候部議富明阿前已告假回籍如病尙可支持卽一面迅速奏聞一面暫駐吉林聽候諭旨如已行抵黑龍江卽著特普欽傳知該將軍遵照阿勒楚喀副都統德英前已令其來京陛見著阜保飭令迅卽來京毋稍延緩將此由四百里

各諭令知之○諭喬松年奏遵陳派兵赴豫情形一摺河南境內
捻逆見分股竄擾汝宛距皖較遠若令皖軍前赴豫省迤西助剿
轉餉殊難康錦文一軍所需餉項向係晉省供支喬松年見將該
軍調赴許州聽吳昌壽調遣以便就近迎提晉餉卽著曾國藩吳
昌壽酌量軍情賊勢何處喫緊與前調赴豫之烏爾圖那遜馬隊
全軍分投調撥飭令扼要防剿以杜賊蹤分竄之路並著官文鄭
敦謹懷遵前旨迅飭姜玉順所部馳赴新野一帶會合豫軍夾擊
並嚴飭襄鄖等處在防各軍實力堵遏以固邊防楚北見已戒嚴
豫省光固一帶防務亦形喫重喬松年見飭張得勝黃秉忠兩軍
前赴固始駐紮作策應楚豫之師並令英翰仍帶所部暫駐潁州
以顧後路卽著督飭該藩司等相機援應實力巡防喬松年所陳
捻匪勢同流寇宜攔擊不宜尾追必須堅壁清野多爲備豫以防

其剽掠馳突見聞賊已入山如能相度地勢擇要堵截俾其不至
逸出即可乘機撲滅所籌尙合機宜並著曾國藩喬松年吳昌壽
會籌辦理將此由五百里各諭令知之○護江西巡撫孫長紱奏
查探髮逆叛勇趨向見籌防剿得旨賊踞鎮平席寶田周寬世王
開琳等軍遠防不如近剿著仍遵前旨嚴飭前赴粵境與閩粵官
軍三面圍逼以期一鼓殲除克竟全功毋稍觀望○庚寅諭軍機
大臣等本日據奕劻等奏稱賊匪竄擾薊州一帶並回竄東北派
兵巡緝各摺片察杭阿等奏稱防護隆福寺情形一摺與昨日文
謙所奏情形大略相同騎馬賊匪竟敢聚眾攜帶槍礮由邊外闖
入遵化玉田寶坻縣境復竄入薊州境內之邦均一帶游駛距隆
福寺不過三四十里膽大橫行至此已極此股匪徒聞由喜峰口
邊外竄入著麟慶迅速查明具奏見在賊蹤已向東北折竄並著

麒慶趕緊揀派得力官兵赴喜峰口邊門截其回竄母令一名逸出邊外仍飭令帶兵將領加意巡緝如有邊外竄來匪股卽行嚴密堵剿不得任令再由此路竄入內地儻有疏虞惟該督是問將此由四百里諭令知之○諭此股馬賊闖入遵化薊州一帶肆行搶掠兒又向東北一帶逃竄並未大受懲創難保不去而復來必應悉數搜拏殲除淨盡本日神機營官兵已由醇郡王奏派馬步隊共一千餘名馳往剿捕並酌派馬步各隊卽日隨同尙書文祥前往隆福寺 暫安殿妥籌防護以昭慎重著劉長佑恪遵昨日諭旨迅飭通永鎮督兵會剿萬青藜卞寶第督飭所屬激勵兵團合力兜剿務將此股賊匪全數弋獲毋任一名漏網奕劻載岱文謙察杭阿等督令守護弁兵晝夜巡防不得稍涉大意將此由四百里各諭令知之○諭前據張亮基奏法國主教胡縛理辦理興

義回匪撫局執迷不悟等情當將原摺批令該總理各國事務衙門議奏茲據奏稱本年閏五月間曾經法國繙譯官豐大業以貴州興義府匪首求該省主教作保投降等詞向該衙門呈遞當經駁斥並函致崇實駁乘章令其密致勞崇光等慎重防維勿爲所惑嗣據崇實等覆稱因恐中途洩露未經函知見經該衙門將張亮基所奏各情與法國使臣伯洛內閣看已商允該使臣函致胡縛理不得干預該省軍務是該公使亦以胡縛理辦理招撫之事爲非並無異說著勞崇光張亮基裕麟傳知胡縛理將法國傳教人向來所持諭單聲明開導遇有地方公私事件及見在勦撫事宜毋令從中干涉致多棘手至劉鴻魁集團勦賊何以旋被殺害究係殺自何人有無主使並該員是否實有縱練殺斃教民之事仍著勞崇光張亮基裕麟查明據實具奏不准稍有隱飾總理衙

門摺一件單四件均著鈔給閱看將此由四百里密諭勞崇光張亮基並傳諭裕麟知之尋勞崇光奏遵查劉鴻魁意在邀功因胡縛理協辦招撫不利於已起意謀殺教士任國柱未成適因勒捐激變捧卹民人致被戕殺得旨前已有旨諭令張亮基斟酌機宜維持大局勞崇光見雖赴滇仍當傳知胡縛理等嗣後不得再行干預地方公事並飭令地方文武遇有關涉教民之案持平辦理毋稍偏枯○辛卯諭軍機大臣等張凱嵩奏官軍偪攻那檀山澤賊巢情形一摺逆首孫芒廣盤踞那檀山澤兩處官軍分路進攻疊有斬擒孫逆或接戰輒逃或伏巢不出亟應乘其窮蹙之際併力圍剿以期一鼓殲除劉坤一所部之軍見已歸劉培一接統並經張凱嵩派令道員覃遠璣會同剿辦卽著張凱嵩督飭劉培一等嚴密布置奮力進攻務將此股賊匪迅速剿除毋令日久負嵎

致兵力爲所牽掣張凱嵩擬俟添募湘勇到粵親赴南甯督剿自必更臻周密一俟孫逆一股剿平後卽分派各軍將鎮安太平等處賊匪次第埽除廓清疆圉馮子材見已抵任近因貴州黎平都勻苗匪猖獗柳慶一帶邊防亦關緊要卽著張凱嵩傳知該提督妥籌防剿毋稍疏忽俟黔防稍鬆或須該提督移軍督辦之處仍著張凱嵩酌量具奏將此由五百里諭令知之○申諭京城嚴緝奸宄○諭李鴻章籌款添造江甯京口駐防衙署兵房○予廣西殉難訓導馮會李炳南陣亡參將王有元等祭葬世職○壬辰諭內閣旨國藩奏總兵患病懇請開缺一摺江南徐州鎮總兵詹啟綸安徽壽春鎮總兵易開俊均著准其開缺調理惟易開俊於閏五月間呈請開缺養病正值捻逆圍攻雒河該總兵不候該督批示徑赴徐州軍營稟請驗病實屬擅離營次本應治以應得之罪

姑念該總兵曾經打仗受傷右目已成瞽廢情尚可憫易開俊著從寬撤去勇號以示薄懲○曾國藩奏總兵陳國瑞隨同親王僧格林沁帶兵剿捻與郭寶昌分統左右兩翼本年四月曹南之戰僧格林沁追賊陣亡郭寶昌不顧主將奉旨革職拏問陳國瑞飾詞巧脫逍遙法外無論所稟受傷各情不足深信即使均屬實情亦祇可略從末減未便概置不問臣伏讀五月初二日諭旨陳國瑞打仗奮勇屢著戰功此次身騎俱受重傷不無可憫姑免置議等因仰見朝廷愛惜將材至意惟臣接統此軍博詢眾論僉稱左右翼長同罪異罰過於懸殊古稱法立而後知恩帥臣當申明法律之嚴庶裨將益感戴 聖恩之厚相應補行糾參請旨將總兵陳國瑞撤去幫辦軍務革去黃馬褂暫畱處州鎮實缺責令戴罪立功以示薄懲而觀後效 上諭浙江處州鎮總兵陳國瑞隨同

親王僧格林沁帶兵剿捻與郭寶昌分統左右兩翼本年四月間僧格林沁在曹州府南境追賊陣亡郭寶昌等救援不力均經降旨分別懲處朝廷因陳國瑞向來打仗尙屬奮勇且於曹南之戰身騎俱受重傷從寬暫免置議茲據曾國藩查明陳國瑞與郭寶昌均充翼長不應同罪異罰惟念其接仗受傷尙可從寬末減陳國瑞著撤去幫辦軍務褫去黃馬褂責令戴罪立功以示薄懲而觀後效○曾國藩奏目前賊勢前股已至南召魯山裕州並聞竄入湖北之棗陽後股由臨潁鄆城折回上蔡又探知賊將竄擾周家口劉銘傳卽日由周家口出隊迎擊前奉諭旨飭劉銘傳一軍循河西上馳赴洛陽以西扼要駐紮自係先事豫防之策臣觀刻下局勢周家口最爲扼要該處距豫之開歸陳許及汝甯光州六府州均在三百里內外卽皖之潁州及蒙亳老巢相去亦不過三

百里八面受敵不可無重兵鎮壓臣所部各軍惟劉銘傳將略較優故以周家口重任付之若令移紮洛陽以西反置勁旅於無用之地至陝西殘破尤甚河南似非該逆所垂涎山西雖屬完善然黃河天險必難遽渡自洛陽至潼關數百里必須晉豫兩省多設礮船乃足禦之亦非陸路一軍所能徧防劉銘傳西去竊恐無益於晉而有損於豫不獨劉銘傳一軍萬難遠調也淮南之勇不慣麪食與楚軍同而其軍火礮械之笨重則更甚於楚軍今河南等省用兵全不講求轉運糧械多有闕乏將士不肯盡力臣與李鴻章所部歷年行兵於江湖水鄉糧運最便士卒安之今改運於濟甯周家口等處尙有淮河一水之便而汴流太遠已覺十分艱難若再令遠征秦晉之交不特不能多運大米並不能多運洋礮恐淮勇遷地弗良或生他變臣見檄翰林院編修張錫幬招募淮北

之勇專取能食麥麪雜糧之人冀備他年征勦西北之用此臣所展轉籌思而未敢輕調秦晉防兵者也至於節制三省之命三次具疏固辭未蒙俞允以臣賦性頗愚卽一省已難專任然臣受恩深重雖數省亦當通籌竊計擒匪可到之處約有八省分爲三路江蘇安徽兩省及豫之歸陳齊之兗沂曹濟十二府州皆東路也直隸山西兩省及豫之彰懷衛輝齊之東武臨清凡在黃河以北皆北路也湖北陝西兩省及豫之南汝洛陝等屬皆西路也論用兵緩急先後之序則東路最重西路次之北路又次之臣自揣殫竭愚忱籌東路十二府之防加以清查民圩訓練馬隊一二軍或可漸就穩固其北路防兵之法西路堵剿之方均非臣力所能逮應請旨飭令山西河南速辦舟師守禦黃河免致賊竄晉境倉皇貽誤並懇 天恩飭下九卿科道八省督撫會議剿擒事宜各抒

所見恭請宸斷定一不可改易之策畫分汛地各專責成庶幾
謀不分歧事有歸宿大局幸甚上諭軍機大臣等曾國藩奏稱
周家口爲入而受敵之地不可無重兵鎮駐若令劉銘傳西進恐
無益於晉而有損於豫所見亦是劉銘傳一軍著仍令駐紮周家
口如賊蹤回竄卽責令帶兵剿擊該大臣見令張錫嶸招募淮北
之勇備他年征剿西北之用此軍若招有成數加以訓練可先派
赴楚豫交界助剿前諭整頓馬隊已有幾起堪以赴豫著卽查明
一面調往一面奏聞該督前奏查辦民圩堅壁清野及直皖東豫
等省均設有勁兵雕剿截擊均是剿辦流寇要著想已通飭各省
一體辦理如何布置之處並著遇便陳奏逆匪竄入湖北之棗陽
後股由臨潁鄆城折回上蔡並有將竄周口之說賊蹤飄忽不常
亟應四面兜剿著官文鄭敦謹喬松年吳昌壽懍遵疊次諭旨催

督各軍合力夾擊該逆曾否復竄周口及連日各軍接仗情形曾國藩等隨時馳奏以慰廬念曾國藩以北路防河之法西路堵剿之方均非力所能逮請飭山西河南速辦舟師守禦黃河亦爲當務之急著吳昌壽王榕吉派員查勘黃河地段何處應行添設船廠卽倣照直隸山東添造礮船辦法咨商辦理以資得力曾國藩辦賊之法前摺已見大概惟軍情變幻靡常豈能遙制著仍隨時與各用兵省分督撫籌商妥辦以期克竟全功所請飭九卿科道八省督撫會議之處著毋庸議另摺奏參陳國瑞未能救護主將已降旨將該員撤去幫辦褫去黃馬褂稍示薄懲該提督能否改過仍著該大臣隨時察看多方策勵可也將此由五百里諭知官文曾國藩喬松年吳昌壽鄭敦謹並傳諭王榕吉知之○兩廣總督瑞麟等奏廣東恩平縣客民與土民仇讐日深見在派員前往

曉諭解散得旨著嚴飭王澍等相機妥辦不准敷衍了事又貽後
日無窮之患○前任吏部右侍郎王茂蔭卒予祭葬○是月豁免
陝西孝義等四廳州縣被擾上年未完糧石